

Jut

Okoro buk nukan onoktapau

Jems nukan amak kon enip Jut nukas kiro pas jer wewon. Kon awak Jems ko Anut nukan roasiret Jerusarem näu mena rai akan kamwariäu ro näwäu. Karauk äpu roat akas keser ronkat oin, kiro ro Jut ko Jisas nukan amak. Kiro jer Mak 6:3 opok rau.

Jut nukas inok roasiret jer we marou rä ik äpu wa. Jut ko sät ämän areäi roat akas Anut nukan roasiret akan woiaka Jisas mesin epar moin utaun rai sät ämän awariäi kiro ämän roumoi, keser jer wewon. Ko keser äiewon, “Ak kiro roat akan ämän wa rowau. Ak Jisas nukan ämän amke roin kiro karar tainori rawe. Anut nukas tawa imäikai.”

Jut nukas Kristen roasiret jer we marowon.

¹ O Jaiat, is Jut, is Jems nukan amak, Jisas Kraiss nukan sarau ro.

Isas ak roasiret Anut nukas urwarnuk, tainorin mesin ak okoro jer we marom. Momonok Anut nukasar ak mesin wous meienuk, Jisas Kraiss nukas ak jekur kamwareäu.

² Anut nukas kon wou akanun meieanik, ak mesin wouti momara, jekur kamwareäu. Kiro akan woiaka päurar senes rawai.

Anut nukas sät ämän miäi roat aru marai.

³ O jaiat, is amke, Anut nukas ik erekapu imäikaun sarau mowon mesin jer we maraun

rai ronkatemin. Utianik, rusapai is ak jer we mareanik, iken woiok epar momun kiro sakau kameanik, kiro iwäi jaunokot itimwaraun rai jer we maraun sakau ronkatem. Karar ses opokar, Anut nukas ik kon roasiret sakau ikonuk, iken woiok epar momun, okon, kar ros iken ronkat piriraun senek wa.

⁴ Is kiro ämän awarom, owon, karauk sätäiäi roat ak ämän ämäi ämäi roasiret awariäi ak Jisas mesin woiaka epar moin ak kamuk pe rai. Kiro roat ak Anut nukan ämän eposek sumkäineäin. Tawa Anut nukas ak wasarewarai. Ak Jisas Kraiss, ko karar iken Näwäü, sumkäineanik, Anut nukas ik sareikaun ämän pakas ätäi pirirmana, sapum onok aru sosop miäi. Meter Anut nukan ämänis keser äiewon, kiro keseriäi roat Anut nukas ak aru marai.

⁵ Ak kiro onok äpu, utianik, is ak Anut mesin ätäi ronkat araurim. Ak äpu Anut Näwäü nukas meter Israel roasiret Ijip omsau pakan imwareanik, kowon. Utianik, rai rai, kiro roasiret karauk ak ko mesin akan woiaka epar mau wa, okon, kos akwaronuk, meiein.

⁶ Ak kiro sarau eitek akan omoi eposek ute manoin ronkatewe. Meter Anut nukan sarau eitek raut nais Anut nukas ak sarau näwäü arowon jekur kamäü wa. Akan mena eposek rain utomana, Anut nukas ak mur sakaus rakis mareanik, karapus owa pututu marowon orip orip rai. Ak Anut nukan wasarewaraun omre kame rai.

⁷ Meter roasiret Sodom Gomora pak karauk näu mena kiro mena siakup rain ak onok aru Anut nukan sarau eitek akas keserin siar keseriäin. Ak

sapum onok aru miäi, onok aru sosop maun akan woiaka siräiäü. Keserna, Anut nukas epis aru marowon. Kiro onok keserwon, kiro ik aparmoi, kiro onok wa keserau rai ätär mukou.

⁸ Kiro roat raiäin senek, ak rusapai rai. Ak nini epir pakas onok aru keserna, ak akasar akan enmaksau aru miäi. Ak Anut nukan ämän wa tainoriäi, ak Anut nukan sarau eitek omar oik rai jeje ämän awareäi.

⁹ Meter Anut nukan sarau eitek karas karauk sarau eitek kamwareäü enip Maikel kos kiro onok keserau wa. Inokos Moses nukan enipsau owaun rai ko Satan jeje ämän aurau wa. Kos auruwon, “Anut Näwäü nukas karar nan enmat opok ämän musai.”

¹⁰ Utianik, kiro roat ak owo onok kiro kon onoktapau äpu wa, akas jeim atei. Ak opur senek ronkat wäpik owo onok aru sepuk sepuk keseriäi, ak kiro keserna akan totomaka aru miäi.

¹¹ Kiro roat ak wopurut, ak Kain nukan onok tainoriäü senek tainori. Meter Balam nukas aiaukun onok aru keserwon senek akas keseri. Meter Kora nukas Anut nukan ämän tainorau wa kos keserwon senek akas keseri. Kiro onok pakas ak erekapu wasarein.

¹² Ak Kristen roasiret woiaka karar mianik, o jaun tururiäi opok, kiro roat ak onok aru orip sätäümana, ak pak erek tururaun wa imineäi. Ak aka mesin ronkateäi. Kiro roat ak iou ärneu om wäpik uriris pairware ariäü senek, okon, ak roasiret wa sarwareäi. Ak am nemauk näu wa muriäi senek, kiro am roat akas torena, meiäü senek keseriäi.

¹³ Ak joi oksipar jekur apariai senek, ak akan oioraka naun onok amop apwareäi. Kiro roat

ak pai omar oikas tākāi neāu senek, Anut nukas kiro roat akan omoi pututu orip orip rawaun sare marowon rau.

¹⁴⁻¹⁵ Kar ro enip Enok ko Adam nukan tupsiu pakan kos kiro roat mesin totok āmān momara, āiewon, “Ak aparwe! Anut Nāwāu, kon sarau eitek sosop senes pak koumara, roat erekapu wasarewaraiei. Kiro roat erekapu kon āmān wa tainoriāi aru maronuk, ak akan onok aru miāi ātāi ronkatāiei. Ak onok aru miāi roat, ak Anut erekapu sumkāineanik, jeim āmān sosop Anut opok moin, okon, Anut nukas ak aru marai.”

¹⁶ Kiro roat ak mekesirakap āmān miāi roat, owo onok ak opok penuk, ak woiaka aru miāi, ak onok aru maun woiaka sirāiāu, ak āmān sepuk sepuk areanik, akan enmaka oik miāi roat, ak karauk roat sātwareanik, akan osap erar oiāi. Kiro roat ak Anut nukas aru marai.

Ak woiaka epar moinai, sakau tai rawe.

¹⁷ O isan jaiat, ak meter iken Nāwāu Jisas Kraiss nukan āmān oi ariai roat akas āiein ronkatewe.

¹⁸ Akas wasarāun omre penuk, karauk roat akas pemana, Anut jeje āmān muraiei rai awaroin. Ak Anut sumkāineā, onok aru maun woiaka sirāiāiei.

¹⁹ Kiro roat akas omnokou pakan ronkat aru tainormana, Anut nukan Osou Nāu wa tainoriāi. Ak karauk kiro roat akan āmān tainoraiei, karauk wa tainoraiei, okon, kiro roat akas ak ināi maraiei.

²⁰ Utianik, ak isan jaiat, akan woiaka Anut mesin epar moin orip orip sakau ate rawe. Ak orip orip Osou Nāu nukan sakau orip Anut aurwe.

²¹ Anut nukas ak mesin kon wous meieäü, okon, ak ko siakup rawe. Kesermana, akan woiaka sakau moinai, iken Näwäü, Jisas Krais nukas ik mesin wouti momara, awau orip orip rawaun onok ikaun kame rawe.

²² Karauk roat akan ronkat oiroror orip mesin woiakati marowe.

²³ Karauk roat ak ep unik uru senek me rai, keseria, akas kiro roat kurte ätäi imware. Karauk roat mesin woiakati mianik, imine orip sarwaraiei. Utianik, akan meten onok aru kiro omjo ukun orip senek ak kiro onok aparnai, atap eur rawe.

Anut nukan enip jou murau.

²⁴ Anut nukasar ak jekur kamwaronuk, ak wa oware nai. Kos ak imwareanik, kon mena eposek opok imware tonai. Ak kiro opok ak ämän wäpik, näwäü nepipir rawaiei.

²⁵ Kiro Anut karar iken Näwäü, Jisas Krais nukan sarau pakas ik imäikowon, okon, ik kon enip karar jou murau. Ko karar ik kamoikaun ro näwäü rawaura. Ko sakau näwäü orip kos osap erekapu kameäü. ko orip orip keseriar raiäü, rusapai nais rau, ko tawa keseriar orip orip rawai. Epar.

Anut nukan Ämän Eposek
The New Testament in the Girawa Language of Papua
New Guinea
Nupela Testamen long tokples Girawa long Niugini
copyright © 1994 Wycliffe Bible Translators, Inc.

Language: Girawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Mar 2025 from source files dated 31 Aug 2023

857654ed-60eb-5741-bcea-dd5397d3f069